



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Su contu de is domus bècias.

In custu logu de “is domus bècias” su dinai est in poderi de su dimòniu, e po custu motivu innoi bessint a pillu cosas malas (fantàsimas), e po mori de custas cosas sa genti timit a ddoi passai a de noti, ca bessint, a candu una fèmina, a candu unu piciocheddu a conca sciota ca scracàliat, a bortas bessit un’òmini chi si chèsciat.

Una borta ddus amigus fortis e coragiosus fiant andaus in paris a biri is “Domus Bècias” poita iant intèndiu ca inni bessiant cosas malas ca fadiant a timi meda, Custu poita non crediant ca podessint essi beras is cosas chi contànt in sa bidde e ca fessint sceti paristòrias.

E manca ddoi fessint abarraus tempus meda castiendi chi non bessessit cosa peruna, iant biu sceti una pudde cun is pilloneddus. Ma a su noti iant biu in su sonnu sa pudde ingiriada de is pilloneddus, cumentu dd’iant bida s’àtera noti is ddus amigus passillendi in sa localidadi de is “Domus Bècias”.

Ma in su sonnu sa pudde fiat sètzia in unu monti de oru. Su mengianu si funt contaus s’unu cun s’àteru su bisu ch’iant fatu e iant pentzau ca sa pudde cun is pilloneddus fessit unu bisu malu e ca nci depeffit essi diaderus oru e dinai.

Su prus atriviu at nau a su cumpàngiu, ca andat cun issu, de ndi bogai su dinai ca fiat interrau inni. Ma custu si fiat refudau casi ca si contat ca su dimòniu donat su dinai a chini ddi donat s’ànima. Ma su cumpàngiu atriviu est andau su pròpiu.

Non si scirit cumentu, ma su fatu est ca cuss’òmini ca fiat stètiu de sempri pòberu apicigau a terra, de sa diri totinduna, est divènniu arricu meda. Ma sa genti de sa bidde iat incumentzau a ddi ghetai tìrria e fiat biu mali de totu is abitantis de sa bidde poita prus fiat arricu e peus fadiat cun is àterus.

Unu mengianu si ndi fiat pesau de spètzia mala e iat nau a su serbidori de ddi cuncordai su cuaddu ca depiat bessiri a su sartu. Su serbidori dd'iat nau ca su cuaddu cussa diri fiat crecosu, e de non si acunnotai a ddu sei.

Ma su meri candu at intèndiu cussu si nd'est arrisiu, at sètziu su cuaddu e est andau conca a su sartu. Ma candu fiat giai-giai arribau su cuaddu s'est arrennegau e at incumentzau a fai crecus, nci dd'at ghetau a terra e dd'at cranciau po tres bortas in piturras.

Intzandus ndi-dd'ant boddii de terra, dd'ant carriau in su carru e dd'ant bitiu a domu sua. Candu est arribau a domu dd'ant donau tres culleras de brodu e s'òmini s'est mortu. Su cuaddu cussa diri teniat su dimòniu in corpus, difatis su dimòniu cussa diri fiat andau po ndi pigai s'ànima a cuss'òmini.